



Communicaziun a las medias

44avel Top Pop Rumantsch: Duo D'n'S - lioms dapi l'uffanza

Cuiria, ils 07-11-2017 – Radiotelevision Svizra Rumantscha (RTR) preschenta la 44avla ediziun da Top Pop Rumantsch cun il duo sursilvan D'n'S. Debora Lutz e Sina Halter chantan lur chanzun «Grazia». Il nov Top Pop vegn preschentà sonda, ils 11 da november 2017 al Radio Rumantsch ed era durant la «Sonda lunga».

Debora Lutz da Glion e Sina Halter da Surcuolm sa conuschian gia dapi passa 7 onns, s'entupadas èn ellas a chaschun da lur participaziun al musical «High School» a Glion. En lur nova chanzun autobiografica «Grazia» laschan ellas pia flurir lur amicizia gia durant l'uffanza, «ensemien far musica ha nus ligiau» di ina lingia. La melodia dal toc, cumponida d'in lavuratori american, fa propi allegras cupitgolas, e las duas vuschs èn purtadas da tempras zunt finas, vuschs che tiran endament la chanson innocenta franzosa. En vardad han Debora e Sina, ubain D'n'S sco ch'ellas sa numnan en art, gia daditg bandunà la tgina materna. L'ina studegia psicologia a Turitg, l'otra linguistica a Winterthur, ed ensemien partan ellas in'abitaziun en las vischinanzas. Tranter en chattan ellas anc peda per pitschnas cumparsas concertantas, accompagnadas da clavazin e ghitarra. Là interpreteschan ellas inquala represa, ma surtut atgnas chanzuns che tunan magari in zic pli melanconicas che quest Top Pop zunt legraivel. Duas soras en musica, e quai «dapi gl'emprem mument», sco l'entschatta da la chanzun di. D'udir a partir dals 11 da november tar RTR e sin la pagina rtr.ch.

Text: D'n'S
Musica: Vince Quintero
Battaria: Rolf Caflisch
Bass: Lucas Schwarz
Ghitarra: Dominik Eberle
Producziun: Manfred Zazzi
Keyboards, percussiun e programmings: Manfred Zazzi

Sonda, ils 11 da november avra RTR sias portas durant la «Sonda lunga». I dat pliras chaschuns d'entupar artists indigens. La chantautura da 18 onns Chiara Jacomet chanta chanzuns ord da ses album «Masra» e Severin Brugger e Laura Loretz preschentan lur simbiosa da musica multifara e lirica en il dialect tuatschin. Era il duo D'n'S è da la partida.

Dapli infurmaziuns

Radiotelevision Svizra Rumantscha, Via da Masans 2, 7000 Cuiria
Diana Jörg-Spescha, tel. 081 255 75 75, diana.joerg@rtr.ch